

Afe ngwi a lo ke mbi ama onoyeye Emi iHibru

Ongwe shewo ngha engyeso emi esho

¹ Tugbe ma Imgbasho gbodze yi emi otsikyeyi nye mbi ama ogbese akpe ibyibi mi ofe idzidza-dzidza,

² kpaa mi egbe emi olele ntona ya, o gbodze yi eyi nye mbi Ongwan, ongwu o kyon dze ogyokwude alungwa duu, ngwu ese ne kpaa o ta ikpewon nani.

³ Ongwe ne tso osa mgbi okwakwa mgbi Imgbasho beyi odzedze mgban yeye, o bwalu alungwa mi ese duu fyii mi mfyee mgbi elodze mgban. Ngwi o wa tso ofe okyi salu ali ibwubwe ngye ne, o ka soko abugye mgbi ongwu Nnghaangha mi esho nani.

⁴ Nghane ongwu beyi iyi mgban duu shewo ngha engyeso beyi iyi mgbi ama kpaa.

⁵ Lubana li ali ongyeso Imgbasho gbo yan ye gbese, <<Abu li ongwe Ani; ine ne Ani yee Otsabu>>? Hona gbese <<Ani ka li Otsan; o dika li ongwen>>?

⁶ Mi ofe oka ya, ngwi Imgbasho kye ongwana ovle deso ba ese ne ma, o gbese, <<Ni engyeso duu su nun.>>

⁷ Odze mi ikpewo engyeso ya o gbese, <<Ongwu kyata engyeso ama nli engbido mgbi Ongwu yee awo yi amoola.>>

⁸ Nghaduu mi ikpewo ongwε yɔ o gbεε, <<Ewe Imgbasho, itsuuto mgbi abu ka dze nghataa gyegwu, osaan dika li olande mgbi esuto mgbi abu.

⁹ Osaan kpa abu itukwu kpaa imbaali ta abu anyi; li ikyengha ngwi Imgbasho mgbi abu kye engyie mgbi atsa kyi abu ikye ngha abuge mgbi abu angbeka aali.>>

¹⁰ O di gbεε, <<Ewe Otse, mi owita-wita ma, li abu kwo afɔ kye εse tuo, esho kpaa di li idabo mgbi abu.

¹¹ A ka dzili, kpaa abu yɔ ka tila dze; a ka sila dafi angwuto mani.

¹² Abu ka fulu ma dafi abu; o dika nyine ma dafi angwuto ogbugbe mani. Nghaduu abu yɔ o ka li ungwonyi kpεte ta aali, onova mgbi abu ka yama dondu ba dududu.>>

¹³ Li ali engyeso ngwi Imgbasho gbɔ yi ama ye gbεε, <<Senke abugye nghataa nin kyata engyikyili mgbi ema yεε itse mgbi ema ogbe afɔ dɔ ele>>?

¹⁴ Engyeso duu li onodzi ama okyido ngwi a dɔ ma εso ikye otobyi ama nka gyokwudε owato-wato ma ba na?

2

Ado okwookwo ikye ogbewebyi

¹ Nghane, i yεε kyεmε ngwi eyi ka gbewebyi ungwɔ ama ngwi eyi teyi fwo na saan, ikye ni eyi wa boofε ba mani.

² Lubana ni εso ngwi engyeso gbɔ na li otsitsi, ni ali ola ofaafa yi ado onghaangha li tu ado okwookwo mgban yεyε wali,

³ eyi ka nye ole kini eyi fwa owato-wato ogbag-badzidzi ngwi Otse woolan, ngwi ama nfwo kyo obwendε nya eyi nε?

⁴ Imgbasho kpaa kyo obwendε mi ele, mi okyo ambe ungwα ama okwulewo ita idzidza-dzidza, O di gha inggise umba onodzi osaan dafi O mina mani.

IYesu yεε dafi emi ongwunon mani

⁵ Imgbasho kye engyeso dzεke gbεε nu ma wa kye εε nkyyiyayi ngwi eyi le gbodzan nε teyi ba.

⁶ Kpaa imbe dzema ngwi inggise oka nu obwendε gbεε, <<Inggise li ekyε se ngwi abu kyon wuuta nghaa, naadi ongwε inggise ma li ekyε se ngwi abu gbekabyin nghaa?

⁷ Abu yilen εε gwee ngha engyeso; abu tukwun okpapyi mgbi okwαkwα yi mmwe

⁸ di non li ikye mi alungwα duu.>> Ngwi Imgbasho kyo nghane, alungwα duu dubon. Nghaduukpaa onene li ungwα duu dubon waba.

⁹ Kpaa eyi di iYesu ngwu a non yεε gwee ngha engyeso na, onene a tukwun okpapyi okwαkwα oshewo beyi mmwε ikyekyε o gbiiso ikwongye, ikye no kwikwu ikye ali inggise duu mi elela mgbi Imgbasho.

¹⁰ Imgbasho ongwu alungwα duu byito abon na, di gbεε i gbuo ni ongye onagbe na yεε saan mi iso ogyeegye se no wa gbe emi onganwα kaka okwαkwα oshewo.

¹¹ Ongwu nnu inggise yεε saan na beyi ama n yεε saan duu li eto onyi. Nghane ayiwi yama kwu iYesu okwu ma di emi ongwunon ba du.

¹² O gbogbɛɛ, <<N ka kwu iyi abu nya emi ongwunani; n ka shashi otse iyi abu mi inai okwakye mgbi emidabu.>>

¹³ O di gbɛɛ, <<N ka kye oyɛyɛ onuunu mgbi ani byi mbon.>> O di kiyayi gbɛɛ, <<Ani dzɛna yi ɛngbɛ ama Imgbasho gbe nu ani duu.>>

¹⁴ Ngwi engwɛ dɛ mi mmbwɛ yi eyi nɛ, ongwu kpaa wa yɛɛ inggise owamye adzi no wa kyi dzili ongye nsulu mfyɛ mgbi ikwongye nani, li owapɛ olodu waali

¹⁵ di dulu ama imio ikwongye kwu ma ofyɛɛ mi oshishe mgbi ama duu ntona wato mani.

¹⁶ Lubana otsitsi-otsitsi yɔ, li engyɛsɔ ngwu o ya ma abɔ ba kpaa li etɔ mgbi Abraham.

¹⁷ Mi itɔdze nɛ i yɛɛ kyɛmɛ-kyɛmɛ no yɛɛ dafi emi ongwunɔn mi ali itɔ ofɛ duu, ikyegbɛɛ no yɛɛ inggise ofife okwukwo odi elela byi otsitsi mi idɔ mgban okyɔ Imgbasho ele, di kyi kyelu ali ibwubwe mgbi inggise.

¹⁸ Ikyegbɛɛ ongwu abuon kpaa gbiiso mi onɔ ngwi a gyilan nɛ, o ka yagba tobyi ama nkaka igyila ntoneni.

3

IYesu shewo ngha iMose

¹ Nghawane, emi ongwunani ama osaan, ama nli ungwonyi yi ani mi ela okwu-kwu ongwɛ esho, gbe ɛwɛ otɛɛtɛ mgbi ema byikɛ mbi iYesu na, ongye ogbikye yi okwukwo inggise ofife ongwu eyi gbela odzan mi ododa nani.

² O tso otsitsi mbi Ongwu nsadun nani, yeyɛ dafi iMose tso otsitsi mi ozu Imgbasho duu mani.

³ A difwi gbɛɛ iYesu dze yi mmwe odatu ngha iMose, yeye dafi otsungwo ozu li sulu mmwe datu ngha ozu abɔn neni.

⁴ Lubana ali ozu duu li inggise mbe, nghaduu li Imgbasho mbe alungwo duu.

⁵ IMose tso oyeye dafi ongbido mi ozu Imgbasho duu, di kyo obwendɛ mi ungwɔ ngwi a ka gbɔn mi iyayi mani.

⁶ Nghaduu iKrestu tso oyeye imbisɔ Ongwe mi ozu Imgbasho. Eyi di li ozu mgban, kini eyi byi itukwu ofyumfye yi ewe ogbe byiibyi mgbi eyi dafi eyi li tsaabo igɛge ma yo.

Ado okwookwo mbi ama n yeyikpa

⁷ Yeye, dafi Onodzi Osaan gbɔ mani, <<Inɛ nɛ, ni ema fwo elan yo,

⁸ ka kye itukwu mgbi ema tiishu dafi emi Israi kyo mi onɔ ngwi a kye iga fyese, onɔ ngwi a mbadi ani mi okwese na ba.

⁹ Imbe ngwi emi otsema mbadi ani onova ngwusefa diye di ungwɔ ngwi ani kyo nani.

¹⁰ Li ikyengha ngwi ani yɛɛ itingga yi etɔ na aali, n di gbɛɛ,

<Itukwu mgbi ama li boofɛ alonɔ duu, a di yama ye ofɛ mgbi ani waba.>

¹¹ Nghane ani fa mi itingga gbɛɛ, <A ka yama kaka mi onya oto-to mgbi ani ba.> >>

¹² Emi ongwunani, onyi mi idzidze ema kpaa no ka sulu itukwu obube hona itukwu onoyeye ba na, ye kyata iyikpa tse Imgbasho oshishe na ba.

¹³ Nghaduu fyi ewema mfye itukwu alegbe-alegbe na, ngwi onɔ ka desho nɛni, adzi ni itukwu mgbi inggise onyi no wa tiishu mi okpagyewo mgbi alobube ba mani.

¹⁴ Eyi ba owa gyokwude ungwonyi mbi iKrestu kini eyi kwudze kpɔklɔ mi abɔ otsigege ngwi eyi tsekise dze yan ababɔ na nghataa ka dondu yo.

¹⁵ Dafi a kwa le gbɔn nɛni gbɛɛ,

<<Inɛ nɛ, kini ema fwo ela gban yo, ka yama kye itukwu mgbi ema tiishu dafi ema kyo mi adɔ onghaangha na ba.>>

¹⁶ Li ele fwo diye nghaadɔ dɛn? Li ama iMose gbe ma tase mi Igyibiti duu na baa?

¹⁷ Di li ele ngwu o kyitingga yi ama onova ngwusefa ntona? Li ama nkyɔ ali ibwubwe, kwulu mi okwese ntona baa?

¹⁸ Di li ele Imgbasho fa gbɛɛ a ka kaka imbe otonya mgbi ongwu ba? Li ama onghaadɔ ntona baa?

¹⁹ Ikyenghanɛ eyi di a yagba kaka ba, ikye oyeye mgbi ama onuunu ba nani.

4

Egbe otonyewo dze ikye emidi Imgbasho

¹ Nghanɛ, dafi ondu odzɛɛdze okaka onya mgban ka dze nɛ, i gbewɛbyi saan na adzi no ka ndɛ inggise onyi okaka ele ba mani.

² Lubana eyi kpaa a gbɔ Esɔ Osuse nɛ nya eyi ungwonyi yi ama; nghaduu esɔ ngwi ama fwo na dze ma abɔ oyaaya ba, ikyekye ama nfwo ma kye oyeye onuunu byi mi ele ba.

³ Onene eyi ama nnoyeye ma kaka onya nani, yeye dafi Imgbasho gbɔ mani gbɛɛ, <<Nghane ani tsekise fa mi itingga gbɛɛ, <A ka yama kaka onya mgben luba.> Nghaduu o teyi ngyelu idɔ mgban mi onɔ ngwi o ta ɛɛ majo.

⁴ Lubana o ple gbɔdze kwu iyi egbe ongwu gyafa mi imbe oka ma gbɛɛ: <<Mi egbe ongwu gyafa ma Imgbasho tonya mi ali idɔ mgban duu.>>

⁵ Imbe ngwi eyi di gbɔ nye na o gbɛɛ, <<A ka yama kaka imbe otonya mgben na ba.>>

⁶ I kiyayi otso gbɛɛ angbeka ka kaka onya nani, angbeka yɔ nose a gbeeso ne nya ma kpaa a kaka ba mi ikye adɔ onghaangha mgbi ama.

⁷ Nghane Imgbasho di kye egbe oka dzeke, kwun gbɛɛ ine, ngwi i wa kye onɔ tunto ne, o gbɔdze nye mbi iDevedi mi ele dafi a teyi gbɔ mani gbɛɛ, <<Ine ne, ni ema fwo ela mgban yɔ, ka yama kye itukwu tiishu ba na.>>

⁸ Lubana iJoshua ki nu ma onya yɔ, Imgbasho ki yama gbɔdze kwu iyi egbe oka wuba.

⁹ Nghane onya sisi ikye mgbi emidi Imgbasho.

¹⁰ Lubana inggise ta nkaka onya mgbi Imgbasho wa yɔ ka tonya idɔ mgban kpaa, dafi Imgbasho kpaa tonya mgban nani.

¹¹ Nghane, ni i fya mi ofya-fya mgbi eyi duu ikye okaka onya nani, adzi ni inggise onyi ka kyedɔ adɔ onghaangha mgbi ama na dzili ba mani.

¹² Lubana elodzimgbasho dze oshishe di dze yi idɔ. I gyigye nga okwusunkli ondu efa, li dze kaka kpini kyi ghalu oshishe yi onodzi, okwokiikwoki yi ifyee ongwu akpukpu, di li gbɔ ewodze otseetse beyi ali ongwu itukwu duu ikwɔ.

¹³ Nkonyi ngwi a ta se da Imgbasho daada dzema ba. Alungwɔ duu dɔ ododa dile gedee mi ine mgbi Ongwu eyi ka wa nu uka mbon nani.

IYesu angbodzi inggise ofife

¹⁴ Nghane, ngwi eyi sulu angbodzi inggise ofife, iYesu Ongwe Imgbasho nlu kedze esho ne, ba ni i kye abɔ byike kpɔklɔɔ mi oyeye onuunu ngwi eyi le tso mi odze mgban neni.

¹⁵ Lubana eyi sulu okwukwo inggise ofife nli di eyi elela mi oshanye-shanye mgbi eyi, ikyekye ongwu kpaa a mbadin mi ali ito ofe duu, dafi eyi kpaa a mbadi eyi neni, ma o gbo mi alobube onyi ba.

¹⁶ Ba i gbleke kwekwe yi itsuuto mgbi elela ne yi imio ba na, ikye nu ma di eyi elela ni eyi di tu elela mgbi Imgbasho no otobyi eyi mi onɔ imina mgbi eyi.

5

¹ A li sadu ali okwukwo inggise ofife duu mi idzidze inggise di li san no gbikye ma mi ungwɔ ngbo ke mbi Imgbasho yɔ, onu umba di fife ikye ali ibwubwe.

² O li yagba kyo dumɔɔ yi ama ndifwi ba dile boofe mani, ikyena ongwu abɔn kpaa dze yi ofe ama ngwi o dzitsi.

³ Li ikyengha ngwi i dze mbiso o ka fife ikye ali ibwubwe mgban beyi ali ibwubwe mgbi inggise angbeka kpaa aali.

⁴ Inggise onyi kpaa ka yagba kye ewon idɔ ne ba; li Imgbasho kyeme ka kwun ela, dafi Eron kpaa Imgbasho kwun ela nose nani.

⁵ Li ngha iKrestu kpaa kye okwɔkwɔ oyɛɛ okwukwo inggise ofife nu ewon ba aali. Nghaduu Imgbasho nyan gbɛɛ,

<<Abu li Ongwani; inɛ nɛ Ani yɛɛ Otsabu.>>

⁶ O di gbɔ mi imbe oka ma gbɛɛ,
<<Abu li inggise ofife gyegwu,
itɔ mgbi iMelkidzɛɛ nani.>>

⁷ Onɔ ngwi iYesu ka dze ɛɛ nɛ ma, o bibɔ yi ekyɛ oto-to yi akwɔ mi ela okwukwo, yi etse inɛ mbi Ongwu nka dulun tɔ mi ikwu mani, Imgbasho di fwon mi osiikyenu mgban.

⁸ Dafi o li ongwɛ nɛ kpaa, o kpayi osiikyenu mi iso ngwi o gye nani.

⁹ Dafi a non yɛɛ saan nɛ, o yɛɛ ofɛ owatɔ-watɔ gyegwu mbi ama nnun oyɛɛ duu.

¹⁰ Li Imgbasho kyon dze okwukwo inggise ofife itɔ mgbi iMelkidzɛɛ nani.

Adɔ okwookwo mi oyɛyikpa

¹¹ Eyi sulu odze kwuba ogbɔɔgbɔ mi ungwɔnɛni, kpaa i sunɔ onu osa ikyena ema li difwi ungwɔ ple ba.

¹² Mi otsitsi ma, i gbuo ngwi ema ki li etsetse onɛnɛni, kpaa i wogyɔ ngwi inggise oka kika tso ema owita-wita otsitsi mgbi elodzimgbasho dudɔ-dudɔ se. I gbuo ngwi ema ka wa enaabe, li ungwogyɛ okpɔklɔɔ waba!

¹³ Inggise nkale nghabɛ mi onɔ ngwi o ka li ongweyeyi nɛ, ka yagba bɛ yi otsootso mgbi odze osaan ba.

¹⁴ Nghaduu ungwogyɛ okpɔklɔɔ dze ikye ama nmyotse, ngwi a gye bɛ nɛ, a kye ewoma kye nyɛlu odifwi idzidza mgbi ungwɔ osuse yi obube.

6

¹ Nghanɛ ni eyi dzata otsootso owita-wita mi odzɛ iKrestu yɛ lu otsootso nmyotse, no ka li okyatitukwu mi alobube nka kye inggise kaka ikwongye hona noyɛyɛ mbi Imgbasho,

² naadi odzɛ otsootso mgbi iBatisima yi abɔ okye dɔ inggise ikye yi okyɛɛ-kyɛɛ mgbi emi ikwukwɔ bɛyi ikwɔ ofwoofwo ogyegwu na ta ba.

³ Ni Imgbasho noofɛ yɔ, eyi ka kyo ngha yɛyɛ.

⁴ Ka li kyɛmɛ-kyɛmɛ ba mbi ama nteyi tu osa ye, ama nteyi tu umba ongwi esho, di dzɛ yi Onodzi Osaan,

⁵ ama n ye mfya mgbi elodzimgbasho bɛyi mfye ama nka kiyayi,

⁶ kini a yeyikpa yɔ, oyile ma dzɛ ofɛ nu ma kyatitukwu ka fyumfye, ikyekye oyeyikpa mgbi ama na, nu ma le yile Ongwɛ Imgbasho gbokwo ekwatsi akpe ongwu fan di non gyayiwi mi ododa.

⁷ Ikpɛsɛ ngwi mmbwo le kya won alonɔ ni eni man yɔ, li nu ungwogyɛ wa lo inggise nshin mani. Inggise na li tu mse mbi Imgbasho.

⁸ Kpaa ikpɛsɛ nlu oshe atato tayo li ayayi ikpɛsɛ. Imgbasho ka won ikamba, owa ngyɛ-ngyɛ yɔ a ka kye toola.

⁹ Emi okani osuse, dafi eyi le gbɔ ngha nɛ kpaa, eyi nu ema oyɛyɛ, eyi ye ta gbɛɛ ema dzɛ yi ungwɔ ingblimɔ nka ba yi ema owato-wato mani.

¹⁰ Imgbasho li emyemyɛ; O ka yama gblimɔ idɔ mgbi ema yi okpitukwu ngwi ema tson ba, dafi ema tobyi emidan dile kiyayi otobyi ma nɛni.

11 Eyi mina gbɛɛ ali inggise mbi ema no tso okwunewo nɛni nghataa dondu, ikye ni ɛwɛ ogbe byiibyi mgbi ema yɛɛ otsitsi mani.

12 Eyi mina gbɛɛ ni ema ka li emi okwulo ba, kpaa ni ema gbama ama nnoyɛyɛ di shitukwu gyokwudɛ ungwɔ ngwi Imgbasho zonu ntonani.

Ondu odzɛɛdzɛ mgbi Imgbasho li

wɛɛɛ ba

13 Onɔ ngwi Imgbasho zonu mgban yi Abraham ma, ngwi o di inggise oka nshe nga ongwu ofa mi iyi mgban ba nɛ, o fa mbi ewon,

14 gbɛɛ, <<N ka kye mse bɛ abu ewo di nu abu engwiba kwuba kyɛmɛ-kyɛmɛ.>>

15 Ngwi Abraham fɛ yi itukwu oshiishi nɛ, o wa tu ungwɔ ngwi Imgbasho zonu mani.

16 Inggise li fa yi iyi inggise ndatu nga ma mani, ma ofaafa na li menbwa yi odzɛ ngwi o gbɔ mani, ta angwɛ otaata na duu li ngyɛ.

17 Ikyegbɛɛ Imgbasho mina gbɛɛ ama ogyokwudɛ mgbi ongwu nu ma ye gbɛɛ ongwu li nyinɛ mi ungwɔ ngwi ongwu zonu ba nɛ, o li gbɔn mi ofaafa.

18 Imgbasho li gbatsika ba! Ikyenghane ondu odzɛɛdzɛ mgban yi ofaafa ka yagba nyinɛ ba. Eyi tsinya luba mbi Imgbasho ikye owatɔ. Inghawane ondu odzɛɛdzɛ mgban ntona nu ma nu eyi itukwu ofyumfye-fyumfye kpɔklɔɔ okye abɔ byike ɛwɛ ogbe byiibyi ndzɛ eyi iyayi nani.

19 ɛwɛ ogbe byiibyi nɛ nu oshishe mgbi eyi kwitse, kpɔklɔɔ di watɔ. Li kye eyi lu kpini mi iyikpa ayangwuto imbe mgbi Imgbasho Nnghao le saan,

²⁰ imbe ngwi iYesu, Ongwu nteyi eyi lu, ka kaka mi ikye mgbi eyi nani. O yee okwukwo inggise ofife gyegwu, ito mgbi iMelkidzede nani.

7

IMelkidzede inggise ofife

¹ IMelkidzede ne nose li uto mgbi iSalen di li inggise ofife mgbi Imgbasho onghaangha. O kpatse Abrahan onɔ ngwi o ka nga emi uto ika ye kye mani, man kye mse ban ewo.

² Ne Abrahan kye onyi mi ikye iwyo mi alungwo ngwi ongwu sulun duu nun. Ababo ita iyi mgban gbɛɛ, <<Uto mgbi osaan>>; oka ya, <<Uto mgbi iSalen>> na itan gbɛɛ, <<Uto mgbi iyu.>>

³ O sulu otson hona onon ba, inyabyi ba, o sulu owita-wita mgbi egbe naadi odo-do mgbi oshishe ba. O li inggise ofife gyegwu dafi Ongwe Imgbasho mani.

⁴ Tsɛwe ito angbodzi inggise ngwu o dze mani, otsikyeyi Abrahan jokpaa kye onyi mi ikye iwyo mi mmgbɛ ngwi o gye mi ika nun!

⁵ Onene i yee ola gbɛɛ emi ongwɛ iLevi ama n yee inggise ofife duu nu ma le gbɛ onyi mi ikye iwyo mbi emi ongwunɔ ma, ama nli ama ofife ba li engwiba mgbi Abrahan neni.

⁶ Abrahan ngwu gbɛ ondu odzedze mgbi Imgbasho ne, iMelkidzede nto mi eto mgbi iLevi ba ne kpaa, gbɛ onyi mi ikye iwyo mbon di kye mse ban ewo.

⁷ Li otsitsi inggise nshewo nga ma li kye mse be ongwu n yeyikpa ewo.

⁸ Inggise ama ofife angbeka ngwu a li nu ma onyi mi ikye iwyo ne duu a li kwulu; kpaa ongwu yɔ Afe tso gbɛɛ o ka dze oshishe.

⁹ Inggise ka yagba ogbɛɛ iLevi nli gbɛ onyi mi ikye iwyo ne kpaa, kye onyi mi ikye iwyo nu iMelkidzede ikpewo Abrahan,

¹⁰ ikyekye onɔ ngwi iMelkidzede kpatse yi Abraham ma, a mba iLevi waba.

IYesu dze dafi iMelkidzede mani

¹¹ Dafi ola mgbi iMose gbɔgbɛɛ ngwi ama ofife tɔ mi etɔ mgbi iLevi ne kpaa, ama ofife ntona ka yagba nu inggise yɛɛ saan ba. Ikyenghane i gbuo ni inggise ofife oka dafi iMelkidzede no dze, ngha ogbɛɛ no li inggise mi etɔ mgbi Eron.

¹² Lubana ni a le nyine etɔ ofife yɔ, ola kpaa li kyeme a ka nyinan.

¹³ Ongwu a le gbɔdze ntonɛ kwu iyin na tɔkye ondudze oka idzidza, ma inggise onyi mi udze na fife mi iwashi ye ba.

¹⁴ I tso saan gbɛɛ Otse mgbi eyi tɔkye iJuda, ma iMose gbɔdze kwu iyi inggise ofife mi etɔ na ba.

¹⁵ Ma ni inggise ofife oka dafi iMelkidzede ne tɔ yɔ, ungwɔ ngwi eyi gbɔ ne nghao ba yi osa,

¹⁶ ikyesine o yɛɛ inggise ofife li mi odzɛɛdze mgbi ola ba, kpaa li ikye mfye mgbi oshishe mgban nka dzili ba mani.

¹⁷ Lubana Afe lɔ gbɛɛ, <<Abu li inggise ofife gyegwu, dafi iMelkidzede nani.>>

¹⁸ A kye ola ongwɔ ababɔ na geke ese ikyekye i fyumfye ba di dze yi oyabɔ kpaa ba

¹⁹ (lubana ola na nu unkonyi yɛɛ saan ba), a di kye ɛwɛ ogbe byiibyi otatase ba, nka gble eyi kɛ kwɛkwɛ yi Imgbasho.

²⁰ IKrestu yɛɛ inggise ofife gyegwu mi ofaafa! Kpaa ama ofife angbeka yɔ, li mi ofaafa ba.

²¹ Nghaduu o yɛɛ inggise ofife mi ofaafa mi onɔ ngwi Imgbasho nyan gbɛɛ:

<<Otɛ fa wa
o dika nyine ondu ba:

<Abu li inggise ofife ogyegwu.> >>

²² Mi ikye ofaafa nɛ, iYesu yɛɛ ondu odzɛɛdze mgbi ondu obwa-bwa ofufe ntatase ngha ogbugbe nani.

²³ Ama ofife angbeka kwuba kpaa ki toma, nghaduu ikwongye gbelo ma ba.

²⁴ Kpaa ikyegbɛɛ iYesu dze oshishe gyegwu nɛ, o ka li inggise ofife gyegwu.

²⁵ Nghane o ka yagba dulu ama nnye mbon ba mbi Imgbasho ma wato klɛklɛ, ikyekye o dze oshishe alonɔ duu ikye otɛɛkyɛ yi Imgbasho ikye ma.

²⁶ IYesu li ito okwukwo inggise ofife ngwu eyi mina mani, ikyekye o le saan, a ka du ongwufabo mbon ba, o dze yi obube onyi ba, a dulun dze enggengga mbi emi obube, a kyilon esho ngha ali mfyɛ mi esho duu.

²⁷ Dafi okwukwo inggise ama ofife angbeka li fife ma, ongwu yɔ, i wogyɔ ngwi o ka fife mi ikye alobube mgbi ongwu bɛyi mgbi inggise angbeka alegbe-alegbe ba. O fife ikye ali ibwubwe mgbi ama akponyi ta mi onɔ ngwi o kwikwu mi ekwatsi mani.

²⁸ Lubana ola li sadu ama nfyumfye ba nu ma li okwukwo inggise ama ofife; kpaa ofaafa nba mi iyikpa ola ma, sadu Ongwe, ongwu nle saan gyegwu nani.

8

Okwukwo inggise ofife mgbi ondu odzæedze ofufe

¹ Odze ngwi eyi le gbo ma li ongwu aani: Eyi sulu ito okwukwo inggise ofife neni, o sɔdze abugye angbodzi itsuuto mgbi Ugabaidu mi esho,

² o li kyido mi imbe osaan mgbi Imgbasho, mi iTabenako otsitsi ngwi li inggise kye tse ba, kpaa li Otse abuon nani.

³ Ali okwukwo inggise ofife duu a li kyon dze ikye onu umba di fife, nghane ongwune kpaa i gbuo no sulu ungwɔ okye nu.

⁴ O ki dze ese ne yɔ o kika li inggise ofife ba, ikyekye ola teyi gbe inggise ama ofife toke wa.

⁵ Imbe osaan ngwi a li kyido mi ele ma li ambe yi onodzi mgbi ungwɔ ndze esho mani. Li ikyengha ngwi a kwo iMose ado mi ono ngwi o le wewo ombɛ iTabenako ma gbæ: <<Gbinebyi saan ni o kyɔ alungwɔ yeye dafi a tso abu mi unggwɔ nani.>>

⁶ Nghaduu ido ngwi a kye wo iYesu abo na datu ngha mgbi ama dafi ondu odzæedze ngwi o li inggise oyile inggise gyiide yi Imgbasho na shewo ngha ogbugbe nani, ikyekye a wo itan mi ondu odzæedze ntatase.

⁷ Ni ondu odzæedze ongwɔ ababo ki sulu okakewo bayɔ, itɔdze opita ondu odzæedze oka ki dzema wuba.

⁸ Kpaa Imgbasho di ungwɔ sisi lon yi inggise
man o gbɛɛ,

<<Otse noola gbɛɛ, onɔ kyɛma,
ngwi ani ka dze mi ondu odzɛɛdze
ofufe yi emi iSrai beyi emi iJuda.

⁹ Otse gbɛɛ, ka yama dze dafi ondu
odzɛɛdze ngwi Ani dze yi otsikyɔma
onɔ ngwi Ani byi ma abɔ kye ma tase
mi iGyibiti na ba,

ikyesine a kwulese dze mi otsitsi
mi ondu ngwi Ani dze yi ama ma ba,
man N kyata iyikpa tse ma.

¹⁰ Otse gbɛɛ, <<Ni egbe ntona wa nye yɔ,
li ondu ngwi Ani ka dze yi emi iSrai aani.
N ka gbe ola mgben wo ma ke itukwu di lo ola
Mgben mi eka mgbi ama.

N ka li Imgbasho mgbi ama a dika li emidani.

¹¹ Mi onɔ na, inggise ka nya inggise
nwatse don hona ongwunon gbɛɛ,
<Ye Otse wuba,> ikyekye ama duu ka ye ani,
wita mbi engbe mgbi ama nghataa
lu mbi engyukwo.

¹² Lubana N ka dzamata yi imbaali
mgbi ama dika we ali
ibwubwe mgbi ama wuba.>>

¹³ Dafi o kwu ondu odzɛɛdze ne gbɛɛ <<ofufe
ne,>> o nu ongwɔ ababɔ na sila; ma ungwɔ nla
sila di kye yɔ, ka byulu mbe onɔ ba.

9

Osusunu mi iTabenako ongwɔ ese neni

¹ Ondu odzæedze ongwi ababɔ dze yi ola mgbi osunu beyi ozu ongwi a ka sunu mi ele mi esɛ nɛni.

² A kye iTabenako wæesɛ. Mi ifu egli ozu mgban ongwi ababɔ ma otlesɛ ipitila dze ele yi adinyatsɛ beyi ibredi ngwi a kye mse bɛ ele; a kwu imbe na gbɛɛ imbe Osaan.

³ Mi iyikpa ayangwuto ongwu fan ma ifu egli ozu dze ele ngwi a kwun di Imbe Nnghao le Saan.

⁴ Iwashi abashi okye ungwɔ ogbungbɛ toola yi ikwulu imu mgbi ondu odzæedze ngwi li abashi-abashi. Imu nɛ dze yi ikpɔkpɔ abashi ngwi imana wele yi okwuta mgbi Eron ngwi tsaabɔ beyi anggaye akwutɛ ngwi a lo ola iwyo ntona mi ele mani.

⁵ Mi ikye imu na Icerubyin (Icerubyin li ambe ngwi a kpa dzɛkɛ otso okwɔkwɔ mgbi Imgbasho) dɔdɔze ele gbiiwulu tukwu imbe elela odiidi. Ng-haduu onɔ gyo ngwi eyi ka tufya odze nɛ shilele waba.

⁶ Ngwi alungwɔ duu tokɛ ondondan nghanɛ, ama ofifɛ li kaka ifoozu ongwi esɛ na alonɔ-alonɔ ikye okiyayi yi idɔ mgbi ama.

⁷ Kpaa li okwukwo inggise ofifɛ ta li kaka ifoozu ongwi idzidze na akponyi mi onova, o li kaka yi eyi kyemɛ ngwi o li ka kye fifɛ ikye ewon beyi ikye ali ibwubwe ama inggise kyo mi ine obuubu mani.

⁸ Mi ungwɔnɛ Onodzi Osaan le tso gbɛɛ, ngwi iTabenako ongwi ababɔ na ka wodze nɛ, ofɛ olu Imbe Nnghao le Saan na, a kye kwulu lasisa waba.

⁹ Nɛnɛ li otso ambe mi onɔ ongwi onɛnɛ gbɛɛ, umba yi ifɛ ofɛɛfɛ ngwi a kye nu na yagba onu ela

ongwi itukwu mgbi ama osunu ntona gbosa ba.

¹⁰ Ola ntonɛ to ikye ungwogye yi ungwɔ owaawa bɛyi oga ewo osa-sa. Ola ikye ungwɔ ama ngwi ine li di ntonɛ ka to nghataa ba onɔ ola ofufe.

Eyi iKrestu

¹¹ Onɔ ngwi iKrestu ba dafi okwukwo inggise ofife mgbi ungwɔ osuse ama nteyi to mmɛnɛ ma, O nyɛ angbodzi iTabenako ngwi nghao shewo di tishi ngha ongwi inggise mɛ, alima li otso gbɛɛ, li ungwɔ ngwi a ta mi ɛɛ nɛ ba.

¹² IYesu kaka Imbe Nnghao le Saan na akponyi ta, nghaduu li mi eyi mgbi mndɔ naadi mnda ba; kpaa li mi eyi mgban abuan ngwi o kye fife se dula eyi to gyegwu.

¹³ Ola mgbi iMose gbɛɛ, eyi mndɔ yi mnda bɛyi utɔ mgbi ibidrua mnda ngwi a kye fwe inggise ama ntsiidza li salu ma nu ma yɛɛ saan mi ikpewo.

¹⁴ Nghaduu, iKrestu dɛɛ yi alobube ba, o di kye ewon fife dafi mfye mgbi onodzi ogyegwu nu Imgbasho. Li ikyengha ngwi eyi mgban nghao fyumfye di nu ewodzɛ mgbi eyi gbosa aali. Ngwi i dɛɛ ngha duu nɛ kpaa, eyi ka kyo Imgbasho oshishe idɔ, i ka kyungwɔ ama nka ba yi eyi ikwongye wuba.

¹⁵ Mi itɔdzɛ nɛ iKrestu li inggise oyile inggise gyiide yi Imgbasho, ikyesine li ongwu ba yi ondu odzɛdzɛ ofufe, ikye ni ama ngwu a kwu ma ela ma tu okwudɛ ngwi a zondun ogyegwu nani. Ngwi o kwulu dafi inggise onagbɛ ikye oshɛ ma

adi mi ali ibwubwe ngwi a kyo mi onɔ mgbi ondu odzɛɛdze ababɔ nɛni.

¹⁶ Mi odzɛ ofɛ ogyokwudɛ yɔ, sedɛ otsungwɔ nɔ ma li kwulu sɛ a ka kyidɔ mi ele,

¹⁷ ikyekyɛ a li kyungwɔ yi afɛ ogyokwudɛ mi onɔ ngwi inggisɛ nɔ ma kwulu sɛ; li sulu mfye onɔ ngwi otsungwɔ nɔn ma ka dzɛ oshishe ba.

¹⁸ Li itɔdze nɛ ngwi ondu odzɛɛdze ongwɛ ababɔ na kpaa li kyidɔ ba, sedɛ a ka dzɛ eyi mmbwaba kyi ele aali.

¹⁹ Ngwi iMose gbɔ ali ola duu nya inggisɛ ntona nɛ, o kye eyi mnda yi eni yi itu omuma bɛyi abɔ ihiso kye fwe afɛ ofulu-fulu yi inggisɛ ntona duu.

²⁰ O gbɛɛ, <<Nɛnɛ li eyi mgbi ondu odzɛɛdze, ngwi Imgbasho woola gbɛɛ ni ema ngyo mani.>>

²¹ Mi itɔ ofɛ nɛ kpɔɔ, o kye eyi na fwe iTabenako na bɛyi alungwɔ ngwi a kyo oyabɔ ele duu.

²² Mi otsitsi, ola mina gbɛɛ ungwɔ angbeka kwuba ni a kyi salu yi eyi. Ni eyi okyi esɛ dzɛma bayɔ odzata inggisɛ yi alobube kpaa dzɛma ba.

²³ Nɛ, i yɛ kyɛmɛ-kyɛmɛ gbɛɛ, ungwɔ emi esɛ nɛ nto dafi ambɛ ungwɔ emi esho duu, a ka kyi salu ma yi ifɛ ntonɛni, nghaduu ungwɔ emi esho abuoma yɔ, a ka kye salu ma mi ifɛ ntatase ngha ntonɛni.

²⁴ Lubana iKrestu yama kaka imbe osaan ngwi a mbɛ mi abɔ nli ambɛ mgbi ude otsitsi na ba; o kaka ude Imgbasho yɛyɛ, ikye oka kwudze inɛ Imgbasho ikye eyi.

²⁵ O yama kaka esuto ongwɛ esho ikye ole yile ewon fifɛ alonɔ-alonɔ dafi okwukwo inggisɛ ofifɛ li kaka Imbe Nnghao le Saan ali onova oka fifɛ yi eyi nli mgban ba na ba.

²⁶ Ki li ngha yɔ, iYesu ki gyadzɛ akpe ibyibi kye onɔ ngwi a ta ɛsɛ ma jo. Kpaa onɛnɛ ɛsɛ dzɛ kwɛkwɛ ongyɛngye se o wa kye ewon fifɛ akponyi ikye ali ibwubwe.

²⁷ Dafi a kye dzɛ gbɛɛ inggise ka kwulu akponyi ta a ka gbɔn ikwɔ nɛ,

²⁸ li ngha a kye iKrestu fifɛ akponyi ikye okyelu ali ibwubwe mgbi inggise kwuba aali. O dika yɛ ba akpe ongwu fan, li owa kyi kyelu ali ibwubwe wuba, kpaa li okye owatɔ-watɔ ba wa nu ama nto le fan mani.

10

IYesu fifɛ akponyi

¹ Ola mgbi iMose dzɛ dafi li onodzi mgbi ungwɔ osuse nkyɛ iyayi ka ba mani. Yama li ungwɔ otsitsi ma yɛyɛ ba. Nghanɛ ifɛ ofɛɛfɛ ali onova ka yagba nu ama ogbleba kwɛkwɛ sunu Imgbasho yɛɛ saan gbɛ ba.

² Ni i kika yagbayɔ, a ki nya yi ifɛ na ofɛɛfɛ wa. Lubana akponyi mata, ama osunu ntona duu kika nu ma yɛɛ saan, itukwu mgbi ama kika nu ma obube mi ali ibwubwe mgbi ama wuba.

³ Nghaduu ifɛ ofɛɛfɛ ntonɛ yɛɛ ungwɔ okyɔ ali iye ikye owɛ ma gbɛɛ a ka dzɛ yi alobube ma,

⁴ ikyekye eyi mnda yi mndɔ ka yagba kyi kyelu ali ibwubwe ba.

⁵ Li ikyengha onɔ ngwi iYesu ba ɛsɛ nɛ ma, o gbɔ yi Imgbasho gbɛɛ, <<Li ifɛ ofɛɛfɛ yi umba ngwi abu mina ba, kpaa abu kye ewo nu ani ikyegbɛɛ ni ani kyɔ abu idɔ;

⁶ Ifɛ otoola beyi ifɛ mgbi alobube li nu abu itukwu oshɛta ba.

⁷ Ta ani gbɛɛ, <N dze na, Afe lo kwu iyi ani gbɛɛ, N ba owa kyo itukwu abu, Imgbasho.> >>

⁸ Ababo o gbɛɛ, <<Ife ofeeɛ yi umba onuunu, umba otoola yi umba mgbi alobube mina abu ba, a di li nu abu itukwu obese kpaa ba>> (ola yo gbɛɛ ni a kyo ma).

⁹ Ne o gbɛɛ, <<N dze na, ani ba owa kyo itukwu abu.>> O kye ofe ofiife ongwɛ ababo na geke ese di ba yi ofe ofufe ngwi li ongwu fan.

¹⁰ Ma mi oweka mgbi Imgbasho na, a nu eyi yee saan mi ikpewo ife ngwi iYesu iKrestu kye ewon fe akponyi nani.

¹¹ Alegbe-alegbe, ama ofife duu li kwudze le kyido ife ofeeɛ mgbi ama; alono-alono a li fe ito ife ngwi ka kyi salu ali ibwubwe gbɛ ba mani.

¹² Nghaduu ngwi iKrestu kye ewon fife akponyi neman, o lu ka sɔke abugye mgbi Imgbasho.

¹³ Kye onɔ na jo o le fe ni a kyata engyikyili mgban nu ma yee itse mgban ogbe afo to ele,

¹⁴ ikyekye mi ife mgban ofeeɛ akponyi na o kyi salu ma gyegwu nu ma yee saan.

¹⁵ Onodzi Osaan kpaa kyo obwendɛ mgbi ungwɔnɛ nya eyi. Ababo o gbɛɛ,

¹⁶ <<Otsɛ gbɔgbɛɛ, mi onɔ na, li ondu odzɛɛdze ngwi ani ka dze yi ama aani. N ka kye ola mgbɛn wo ma ke eka dika lo ma mi itukwu mgbi ama.>>

¹⁷ O di mbwumbwo gbɛɛ, <<N ka we ali ibwubwe yi ado okyeekye mgbi ama wuba.>>

¹⁸ Kini a to ma mkpa mi ali ibwubwe yi ado okyeekye mgbi ama yo, ife ofeeɛ ikye alobube dzema wuba.

I gbo ba mbi Imgbasho

19 Nghawane, emi ongwunani, dafi eyi dze yi imio ewo ba okaka Imbe Nnghao le Saan mi eyi mgbi iYesu,

20 mi ofe ofufe ngwi nye kaka oshishe ne! Ofe ne kye ikpewo ayangwuto nli iKrestu abon neni.

21 Ngwi eyi dze yi angbodzi inggise ofife nle di mi ozu Imgbasho ne,

22 ni i ba kwekwe yi Imgbasho itukwu onyi mi oyeye onuunu mgbi otsitsi, beyi itukwu ngwi a kye salu mi itukwu mgbi eyi ogye obube di kyi salu eweyi mi eni oglododo.

23 Ni i ka suusu mi ewe mgbi eyi ogbe byiibyi ngwi eyi le gbɔn mi ododa ne ba, lubana ongwu nzondu ma li nyine ba.

24 Ni eyi di di ofe ngwi eyi ka kwu eweyi ewe wo ikye otso okpitukwu di kyungwo osuse mani.

25 Ni i ka nde okwakye yi eka dafi angbeka le kyo na ba, kpaa i kwu eweyi ewe wo onghaangha duu yo ngwi onɔ le mba neni.

26 Kini eyi kiyayi okyo alobube mi oshu onɔ ngwi eyi sulu odifwi-difwi mgbi otsitsi ne yo, ife ofeefe ikye alobube onyonyi kpaa dzema wuba,

27 kpaa li imio mgbi ikwo ogbɔgbɔ yi amoola itingga nkye iyayi kawa gye engyikyili mgbi Imgbasho nani.

28 Ni inggise efa hona eta kyo obwende mi ikye inggise gbɛɛ o foola mgbi iMose yo, a li ngwon yi elela odiidi ba.

29 Tsɛwe di dafi ado okwookwo mgbi ama nkye afo si Ongwe Imgbasho di kyo yi eyi mgbi ondu odzɛɛdze wo dafi li ungwo nle saan ba ka dze mani. Ito inggise ntona fya Onodzi Osaan nkye elela mgbi Imgbasho ba mbi emidan na ito.

³⁰ Lubana eyi ye ongwu ngbɛɛ, <<Li ido mgbi ani okpa mkpa; N ka kwo ma ado,>> <<Otse dika fwo emidan ikwo.>>

³¹ Li ungwo okwulewo ni inggise gbese wo Imgbasho oshishe abo.

³² We dafi ema gyadze kpakpa mi owita-wita ngwi osa mgbi Imgbasho ba mbi ema mani.

³³ Onoka a li fya ema ito mi ododa di nu ema iso; onɔ angbeka yo li dze ema gbɛɛ ema ki ya ama a le nu ma iso na abo.

³⁴ Ema li tobyi ama nwoto obawi, ni a kyi gbelu ungwo ngwi ema dze yan duu kpaa ema li dze yi atsa, ikyekye ema abuema ye gbɛɛ ema dze yi ungwo ama ntatase di li gyegwu.

³⁵ Nghane ka gbewengwuta yi abo otsigɛɛ mgbi ema ba na; ema kawa tu umba mi ele shewo.

³⁶ I wogyo ema ka shitukwu ikye ni ema kyo itukwu Imgbasho, ema ka tu ungwo ngwi O zonu mani.

³⁷ Lubana mi ongwono gwee ta, <<Ongwu nka ba ma ka ba yi onɔ ombeembe wuba.

³⁸ Emidani ama osaan ka dze oshishe mi oyeye onuunu.>> Kpaa ongwu n yeyikpa yo, ka kpen yan ba.

³⁹ Nghaduu eyi li ama n yeyikpa ngwi a di dzili ma na ba, kpaa eyi li ama nnoyeye ngwi a dula ma wato nani.

11

Oyeye onuunu

¹ Oyeye onuunu li ungwo ama nka wa dze kyeme ngwi eyi gbewebyi ele, ambe mgbi ungwo ngwi eyi li di ma ba mani.

² Li oyeyɛ onuunu nu ma tse emi otsikyeyi tugbe aali.

³ Li mi oyeyɛ onuunu ngwi eyi tu osa gbɛɛ Imgbasho ta ɛɛ mi elodze mgban, nghanɛ ungwɔ ngwi a ta ma ngwi eyi li di ntonɛ, a ta ma mi ungwɔ ngwi inɛ li di ba mani.

⁴ Mi oyeyɛ onuunu Ebel fife ntatase nu Imgbasho ngha mgbi iKain. Mi oyeyɛ onuunu a tsan gbɛɛ o li inggise osaan, onɔ ngwi Imgbasho she inɛ ta ikye yi umba mgban mani. Ngwi Ebel kwulu nɛ kpaa, o kale gbɔdze oyeyɛ onuunu mgban yi eyi.

⁵ Enɔku nose noyeyɛ o di ikwongye inɛ ba, a kyon lu esho oshishe a din wuba. Kpaa duuse ni a kyon lu esho yɔ, a tsan gbɛɛ o li inggise nkyɔ owitukwu Imgbasho.

⁶ Ma ni li mi oyeyɛ onuunu bayɔ inggise onyi ka kyungwɔ kpa Imgbasho ba, ikyekye ali inggise nba mbon yɔ li kyemɛ no noyeyɛ gbɛɛ o dzema, o di li nu ama npitan mi otsitsi ma umba.

⁷ Ikyegbɛɛ iNua noyeyɛ nɛ, Imgbasho kye ungwɔ nka wa kyɔ mi iyayi tson. O fwo Imgbasho di kpa uwaa ngwi dulun tɔ yi etɔ mgban. Mi itɔdze nɛ a gbɔ ɛɛ ikwɔ, man a kye mse ndze ikye ali inggise osaan ma kye nun.

⁸ Abrahan noyeyɛ di fwo Imgbasho. A nyan gbɛɛ no lu imbe ngwi o kawa gyokwudan, ngwi Abrahan nu Imgbasho oyeyɛ nɛ, o ye ɛɛ na ba kpaa o lu.

⁹ Mi oyeyɛ onuunu o lu dafi ingyoga ka mbe ude mgban mi ɛɛ ondu odzɛɛdze mi anengye; o la afu, dafi Adziki yi iJeko ama ngyokwude ungwonyi yan kpaa la mani.

¹⁰ Lubana o gbinebyi ogalu ngwi a wo itan, ngwi inggise ombaamba yi ombæembe li Imgbasho nani.

¹¹ Abrahan noyeye gbæ Imgbasho ka mbwo ondu odzædze mgban, li ikyengha ngwi Abrahan kye ngwi iSara di li ogyoma kpaa yæ ungwo otu ongwe aali.

¹² Nghane li ikpewo Abrahan onyi ngwu kye kika mbongwe gbæ wuba næ, ngwi engwiban to mbwo dafi mæ mi akpa beyi mfyam mi ekyoo aani.

¹³ Inggise ntone duu kale noyeye se a kwa kwulu. A yama tu ungwo ama ngwi a zonu yi ama ntona ba; a di ke mbombo ma i tsa ma atsa. A di gbela gbæ ama baaba di li ingyoga mi esæ neni.

¹⁴ Inggise ama ngbo ito odze ntone le tso gbæ a le mina esæ nka li mgbi ama.

¹⁵ Ni a kile tsewe esæ ngwi a dzanta na yo, a kika tu ofæ oye lu ele.

¹⁶ A ye le tsewe esæ ntatase ongwi esho nani. Nghane i kwu Imgbasho ayiwi onu ma kwu ongwu gbæ Imgbasho mgbi ama ba, ikyekye o mbe ma ogalu.

¹⁷ Li mi oyeye onuunu ngwi Abrahan kye ongan Adziki nu ono ngwi Imgbasho mbadin na aali. Abrahan ngwu Imgbasho zonu yan næ wewo okye ongan onyi kpokpo fife.

¹⁸ Dafi Imgbasho zonu yan gbæ, <<Ka li mbi Adziki næ ngwi a ka wita ogbo eto mgbi abu.>>

¹⁹ Abrahan ye ta gbæ Imgbasho li kyile emi ikwukwo, i ke dafi li mi ikwu ngwi o yile Adziki mani.

²⁰ Li mi oyeye onuunu ngwi Adziki kye mse be iJeko yi Isol ewo ikye odzedze mgbi ama ongwii iyayi aali.

²¹ IJeko mi oyeye onuunu mgban duuse no kwulu ya, o kye mse be emi ongwɛ iJose duu ewo, di fyike okwuta mgban ye sunu.

²² IJose mi oyeye onuunu mgban, ngwi o wa dze kwekwe okwulu jokpaa, o gbɔdze oto-to mgbi emi Israi mi Igyibiti, o nya ma gbɛɛ nu ma wa kye akpukpu mgbi ongwu byi lu yi ama.

²³ Li mi oyeye onuunu ngwi ama omba iMose kyon da me ofyia eta mi onɔ ngwi a mban mani, ikyekye ama omban di gbɛɛ odzedze mgban li idzidza yi engbe angbeka, a di wimio ola ngwi uto wo ma ba.

²⁴ Mi oyeye onuunu ngwi iMose wa she kpaa o gbela nu ma yon gbɛɛ ongwu li ongwiba mgbi iFaro mbi ongwan ongwu ongyaa ba.

²⁵ O di gbɛɛ i tatase ni ongwu gyadze ungwonyi yi emidi Imgbasho ngha onu ongwu gye ɛɛ mi alobube mi ongwono gwee.

²⁶ O kye ayiwi ogyeegyɛ mi ikye iKrestu wuuta ngha aludu mgbi emi Igyibiti nani, ikyekye o kyinebyi umba mgban nkyɛ iyayi mani.

²⁷ O dzata Igyibiti mi oyeye onuunu, o yama wimio itingga mgbi uto ba dududu, o shitukwu kpɔɔ ikyekye o di ongwu a li dun ba nani.

²⁸ Li mi oyeye onuunu ngwi iMose wo emi Israi ola gbɛɛ nu ma le gye oga owe owato-wato di kye eyi kyi onufe ikyegbɛɛ ongwu nka wa dzili engwevle na no ka kye abɔ gbo ongwovle emi Israi ba aali.

²⁹ Mi oyeye onuunu inggise ntona kyikye mi ikpese nye onekyoo omuma, kpaa ngwi emi igyibiti fya gbese ama kpaa ka kyedo ma ne, eni dzili ma.

³⁰ Mi oyeye onuunu ogalu iJeriko bulu tukwu ese, onogwi emi Israi kyikye kpaste ikpishi ogalu na egbe egyafa mani.

³¹ Li mi oyeye onuunu ngwi a ngwo owagbai iRaha yi ama onghaado emi iJeriko ntona ba aali, ikyekye o gbe ama owodi ntona abo efa.

³² Nin di gbo ali odze? N sulu onogboodze mgbi iGidon, iBaraki, iSansin, iJefta, iDavedi, iSamue beyi ama ogbese ba,

³³ ama nkyi gbelu esuto kwuba mi oyeye onuunu di li gbiikwo mi emyemye di tu ungwogwi a zonu yi ama nani; a tukwulu ugaba ondu,

³⁴ di myunu amoola okwusunkli di gye ma ba; ewo odzaatsi mgbi ama kyata yee enepe; a yee engyilika di ngha oblakwutse emi iyikpese ika.

³⁵ Engyaa di emidama nkwulu se ngwi a di kyile ma mi ikwu mani. A nu angbeka iso kpaa a fwa odzata Imgbasho, ikye nu ma wa tu okyee-kyee mi ikwu osuse.

³⁶ Angbeka gbiiso mi agya yi ibe ogboogbo, a kwa di bwa angbeka adi gbe ma ka woke obawi.

³⁷ A tsengwo angbeka mi akwutse, kwodze angbeka efa; a ngwo angbeka mi okwusunkli. A le ga kye yi okpa mmala yi okpa mndo ewo, a tundze yi adze, a nu ma iso di kyo yi ama timbi-timbi.

³⁸ Ese ne gbuo yi ama wuba. A le ga kye imbe okplagada yi unggwo yi ifo akwutse beyi ishe mi ikpese.

³⁹ Ama duu, a tse ma ikye oyeye onuunu mgbi ama, nghaduu kpaa a yama tu ungwɔ ngwi a zonu onu ma ma ba.

⁴⁰ Imgbasho tsewe ungwɔ osuse ikye eyi, ikyegbɛɛ nu ma beewo yi eyi yɔ a ka nu ma yɛɛ saan.

12

Imgbasho nye emi onghan

¹ Ikyenghanɛ, ngwi obwendɛ lokawo eyi wane, ni i gbe ungwɔ ama otukwu eyi ofɛ beyi alobube ama nli wo eyi ekle sunɔ ba duu ngwuta, adzi ni eyi gbili ikye ungwɔ ngwi a kye dze ikye eyi ma yi itukwu oshiishi.

² I gbe ine mgbi eyi byi mbi iYesu na, o li owita-wita yi ongyɛngye mgbi oyeye onuunu mgbi eyi, ikye atsa ndzan iyayi nani. O shitukwu mi ekwatsi kye ayiwi wuuta ba. Nghanɛ o sɔdze itsuuto mi abugye mgbi Imgbasho oneneni.

³ Tsewe di dafi iYesu shitukwu kpakpa mi ofwaafwa ngwi emi alobube fwan mani, ta sika kaka abu ewo ba, itukwu dika sha abu anyɛ wuba.

⁴ Ofyaafya ngwi ema fya gbɛɛ ni ema ka kyɔ alobube ba duu kpaa, ema yagba dzeeyi kyese dafi iYesu kyɔ na waba.

⁵ Ema gblimɔ elodze ngwi Imgbasho kwu ema ewe wo mi ele dafi emi onghan maa? O gbɛɛ:

<<Ongwani, ka kwu onyɛnyɛ

mgbi Otse shanye ba,

itukwu no dika sha abu anyɛ onɔ

ngwi o kyɔkyɔ odze yi abu ba,

⁶ ikyekye Otse li nye ama nkpan itukwu mani.

O di li kwo ali inggise ngwu o
gbelan gbɛɛ li onghan duu adɔ.>>

⁷ Shitukwu mi iso ikyekye li ofe mgbi onyeenye;
Imgbasho le kyo yi ema dafi engwe. Lubana li ali
ongwe ngwi otson li nyan ba?

⁸ Kini a nye ema ba (ma angbeka duu gbe
onyeenye ya), ema li engwe yeye ba kpaa engwe
uka.

⁹ Lubana eyi duu to yi otso emi ese ne ama nli
nye eyi, eyi di li nu ma mmwe kpaa. Nghane
Otseyi onghi onodzi ndi dze oshishe se eyi ka kye
eweyi nun no nye ba daa?

¹⁰ Emi otseyi li nye eyi mi onghono gwee dafi a
di gbɛɛ i gbuo mani, kpaa Imgbasho li nye eyi gyo
no to tishi lo eyi, adzi ni eyi dze saan dafi Ongwu
mani.

¹¹ Onyeenye onyonyi kpaa li tishi mi ongho ngwi a
le nye ma ba, li wulewo. Ama ngbe onyeenye ma
a li wa tu owaawa mgbi osaan beyi iyu mi ongho
ongwi iyayi.

¹² Nghawane, ni abo mgbi ema yi akwafɔ ot-
saatsa kwumfye.

¹³ Melu ofe oshishe mgbi ema no dze yeye
ikye ni ama nfyumfye ba ka wende ba, kpaa ye
fyumfye mi oyeye onuunu mgbi ama.

*Adɔ okwookwo mbi ama
nfwa Imgbasho*

¹⁴ Fya mi ofyaafya mgbi abu ni abu dze mi iyu
yi ali inggise duu di dze saan; no li mi osaan bayo
inggise onyi ka di Otse ba.

¹⁵ Fya ni elela mgbi Imgbasho ka nye inggise
onyi ba dika nu inggise oka itukwu owulu-wulu

ikye oba yi ema angbeka okakewo di gbe inggise kwuba woke idza ba na.

¹⁶ Fya saan gbɛɛ ni inggise onyi kyo amah hona ye Imgbasho ba ito mgbi iSol ongwu nkye ongyukwo mgban gya ikye ungwogye na ba.

¹⁷ Ngwi ungwɔnɛ wa nye nɛ, i minan gbɛɛ otson no kye mse nɛ ban ewo, nghaduu o kwɔn. ISol tsukwu yi etse ine kpakpa kpaa onɔ nye okye mse na nun.

¹⁸ Ngwi ema ba mbi Imgbasho nɛ, ema yama ba mbi ungwɔ ngwi inggise owamye ka yagba kye abɔ gbon ito ngwi emi Israi di mi unggwɔ iSinai na ba. A kpatse yi ola ogbaamu nle gbɛ di yifu di fa dafi idablu.

¹⁹ Ema fwo ofofo mgbi agba beyi elodze nle sandu jo ngwi emi Israi fwo di tekye gbɛɛ Imgbasho no ki gbɔdze yi ama mi ela na wuba, na ba.

²⁰ Emi Israi tekye ikyekye ama ka yagba yi ito ola ngwi a wo na ba: <<Kini mmbwaba jokpaa kye ewo gbo unggwɔ na yo, ni a tsengwɔn mi akwutse kyemɛ-kyemɛ.>>

²¹ Ungwɔ ngwi a di na wimio jo iMose gbɛɛ, <<N le shi adagba yi imio.>>

²² Kpaa ema bato unggwɔ iDzayɔn, mi iJerosalin ongwɛ esho, ogalu mgbi Imgbasho oshishe nani. Ema bato okwakye atsa oshewo mgbi engyeso idubu-idubu.

²³ Ema bato okwakye mgbi ongwovɛ, ama ngwu a lo iyi ma mi esho mani. Ema bato mbi Imgbasho, ongye ofwo ali inggise duu ikwɔ nani yi mbi onodzi mgbi inggise ama onyaan ngwu a nu ma yɛɛ saan,

²⁴ ema bato mbi iYesu ongye oyile inggise gyiide

yi Imgbasho mi ondu odzɛɛdzɛ ofufe bɛyi eyi ngwi a kye kyi ngbɔ elodze tatase ngha eyi mgbi Ebel nani.

²⁵ Fya ni ema di gbɛɛ ema kwu ela mgbi ongwu ngbɔdzɛ na fungbɛ ba. Kini a yagba tsebyulu wo ongwu nkwo ma adɔ mi ɛsɛ nɛ ba ma, eyi ma ka tsebyulu wo ongwu esho nkwo eyi adɔ na gbɛɛ?

²⁶ Tugbe ma ela mgban nu ɛsɛ suusu, kpaa onɛnɛ o zonu gbɛɛ, <<N dika nu ɛsɛ kyoon suusu ba esho kpaa ka suusu.>>

²⁷ Elodze <<dika>> nɛ tso gbɛɛ, ungwɔ ama Imgbasho ta duu, a ka su ma di kye kwɔlu ma, ikyegbɛɛ ungwɔ ama nka suusu ba ma nu ma dze gyegwu.

²⁸ Nghawanɛ, dafi eyi le tu esuto nka suusu ba nɛ, i ta Imgbasho angba ye sunun yi ewo oyile ɛsɛ yi imio,

²⁹ lubana <<Imgbasho mgbi eyi li ola nli gye sisi ba.>>

13

Odze owe-we ongwi olele

¹ Kiyayi odi ewema kpitukwu dafi engwunɔ ewee mani.

² Le gbɛ ingyoga mi ude ema na, li mi ito ofɛ nɛ ngwi inggise angbeka gbɛ engyeso saan kpaa yama ye ba aali.

³ Wɛ ama nwoto obawi yeye dafi ema kpaa wodze ele yi ama mani, dika gblimɔ ama ngwu a le nu ma adze ba, dafi ema kpaa wodze ifu adze na yi ama mani.

⁴ Wo eba okwokyii kwokyii okpa na, di kye akwulo eba okwokyii kwokyii dze saan, lubana

Imgbasho ka gbɔ emi amah beyi ama okyɔ amah idza ikwɔ.

⁵ Oshishe mgbi ema no dze enggengga mi imina mgbi udza, ungwɔ ngwi ema dzeɣan no gyɔlo ema, ikyekye Imgbasho teyi gbɛɛ, <<N ka yama dzata ema hona gblimɔ ema ba.>>

⁶ Nghane eyi gbɔ yi abɔ otsigegɛ gbɛɛ, <<Otse li ongye otobyi ani; n ka yama tsimio ba. Li ekyɛ ngwi inggise owamyɛ ka kɔ ani?

⁷ Wɛ ama ngbe ema teyi di gbeeso Imgbasho nya ema ntonani. Kyidi itɔ oshishe nose ngwi a sulun mani di kye afɔ ma.

⁸ IYesu iKrestu li ungwonyi edede yi ine nghataa gyegwu.

⁹ Nu ma ka kpagya ema wo yi otsootso angbeka ba. I tishi ni itukwu mgbi eyi fyumfye mi elela mgbi Imgbasho, no ka li mi ola mgbi ungwogye, ndze yi abɔ oyaaya mbi ama nle gye ma ma ba.

¹⁰ Eyɛ sulu iwashi ngwi ama okyidɔ mi imbe ofife kpaa dze yi ofe ogye ungwogye mi ele ba.

¹¹ Okwukwo inggise ofife li kye eyi mmbwaba kaka Imbe Nghao le Saan ikye ofife mgbi alobube, nghaduu mmbwe yɔ a li gbe toola mi esise.

¹² Li ikyengha ngwi iYesu kpaa gyadze tase dzata ogalu ka kwulu ikye onu inggise yee saan mi eyi mgban aali.

¹³ Nghane ni eyi kpaa tase dzata ogalu ka tun di gyayɛwi yan ungwonyi.

¹⁴ Lubana mi ese ne eyi sulu ogalu nka dze gyegwu ba, kpaa eyi le fe ogalu nka wa ba nani.

¹⁵ Mi ikpewo iYesu, ba ni eyi fife nu Imgbasho le tse iyin dile gbodzan along duu.

¹⁶ Dika gblimɔ okyumse di ghumba ba, lubana ito umba ntona li kpa Imgbasho.

¹⁷ Siikyenu ama ogbe ema teyi di gbela yi ola mgbi ama. A le di mbi ema dafi inggise ama nka wa nu uka ikye ema mani. Fwo ma adzi ni ido mgbi ama no dze yi ama atsa. Ni ema yee ma okye yo, ka ya ema abo ba.

¹⁸ Bibo ikye eyi na. Eyi ye ta gbɛe itukwu mgbi eyi gbosa eyi di mina ole kyo oshishe nka ba yi mmwe ali ofe duu.

¹⁹ Ani abuen tekye nu ema gbɛe ni ema bibo ikyegbɛe ni ani ye ba mbi ema dzikan-dzikan.

²⁰ Ni Imgbasho mgbi iyu, Ongwu mi ikpewo eyi mgbi ondu obwa-bwa ogyegwu, nkyile Otse mgbi eyi iYesu, okwukwo inggise ongyo mmala mi ikwongye na,

²¹ kye alungwo ntishi okyo itukwun duu nu ema, no di kyido mbi eyi mi ofe nkpan mani, ikpewo iYesu iKrestu, ngwu okwɔkwɔ dze mbon gyegwu-gyegwu nani. No dze ngha.

²² Emi ongwunani, n lo ema ongwɛ afe ne ikye okwu ema ewe wo, nghane n tekye gbɛe ni ema gbewebyi saan mi ungwo ani gbo ma ntoneni.

²³ I mina ani onu ema ye gbɛe a dulu ongwuneyi iTimoti mi obawi wa. No wa kaka vla yo, n ka kyon wafɔ yen ba wa kpadi ema.

²⁴ Ta ama ogbe ema teyi yi emi osaan duu angba. Emi iKrestu mi iTali dɛso angba mbi ema.

²⁵ Elela mgbi Imgbasho no dze yi ema duu.

Etulo NT

Portions of the Holy Bible in the Etulo language of Nigeria

copyright © 2024 Initiative for the Translation and Development of African Languages

Language: (Etulo)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 26 Jul 2025 from source files dated 9 Jul 2025

156b6685-3a62-5375-95ed-97245882cc90